



02234

天津特別市  
市立第二圖書館  
02234



天津特別市市立第二圖書館 29-6.10.000

漢鄭氏註

周

禮

稽古樓梓

漢鄭氏序

國朝

六部

世祖以來通人達士大中大夫鄭少簡及  
子大司農仲師議郎衛次仲侍中賈君景  
伯南郡太守馬季良皆作周禮解詁元龜  
觀二三君子之文章顧旨竹帛之浮辭其  
所變易灼然如晦之見明其所彌縫奄然  
如合符復析斯可謂雅達廣攬者也二鄭  
者同宗之大儒今贊而辨之庶成此家世  
之所訓也

周禮序

卷首

稽古樓

周禮目錄

漢 鄭 氏 註

天官冢宰第一

象天所立之官冢大也宰者主也天者統理萬物天子立冢宰使掌邦治亦所以統御眾官使不失職不言司者人宰總御眾官不主一官之事也

地官司徒第二

周禮

目錄

卷首

一 稽古樓

象地所立之官司徒主眾徒地者載養萬物天子立司徒使掌邦教亦所以安擾萬

民

春官宗伯第三

象春所立之官也宗尊也伯長也春者出生萬物天子立宗伯使掌邦禮典禮以事神爲上亦所以使天下報本反始不言司者鬼神元人之所尊不敢主之故也

夏官司馬第四

象夏所立之官馬者武也言爲武者也夏整齊萬物天子立司馬使掌邦政政可以平諸侯正天下故曰統六師平邦國

秋官司寇第五

象秋所立之官寇害也秋者道也如秋義殺害收聚斂藏於萬物也天子立司寇使掌邦刑刑者所以驅恥惡納人於善道也

周禮

目錄

卷首

二

稽古樓

冬官司工記第六

此篇司空之官也是官名司空者冬閉藏萬物天子立司空使掌邦事亦所以富立家使民無空者也司空之篇亡漢興購求千金不得此前世識其事者記錄以備大數古周禮六篇畢矣

周禮卷之一

漢鄭氏註

天官冢宰第一

惟王建國辨方正位體國經野設官分職以爲民極乃立天官冢宰使帥其屬而掌邦治以佐王均邦國

建立也周公居攝而作六典之職謂之周

禮營邑於土中七年致政成王以此禮授

周禮

天官

序官

一

稽古樓

之使居維邑治天下司徒職曰日至之景尺有五寸謂之地中天地之所合也四時之所交也風雨之所會也陰陽之所和也然則百物阜安乃建王國焉辨別也鄭司農云別四方正君臣之位君南面臣北面之屬玄謂考工匠人建國水地以縣置欂以縣視以景爲規識日出之景與日入之景晝參諸日中之景夜考之極星以正朝

夕是別四方召誥曰越三日戊申太保朝  
至于雒卜宅厥既得卜則經營越三日庚  
戌太保乃以庶殷攻位於雒汭越五日甲  
寅位成正位謂此定宮廟體猶分也經謂  
爲之里數鄭司農云營國方九里國中九  
經九緯左祖右社面朝後市野則九夫爲  
井四井爲邑之屬是也設官分職謂置冢  
宰司徒宗伯司馬司寇司空各有所職而

周禮

天官

序官

二

稽古樓

百事舉極中也令天下之人各得其中不  
失其所掌主也邦治王所以治邦國也佐  
猶助也鄭司農云邦治謂總六官之職也  
故大宰職曰掌建邦之六典以佐王治邦  
國六官皆總屬於冢宰故論語曰君薨百  
官總已以聽於冢宰言冢宰於百官無所  
不主爾雅曰冢大也冢宰大宰也

治官之屬大宰卿一人小宰中大夫二人宰

夫下大夫四人上士八人中士十有六人旅  
下士三十有二人府六人史十有二人胥十  
有二人徒百有二十人

大宰之大  
音秦下同

變冢言大進退異名也百官總焉則謂之

冢列職於王則稱冢冢大之上也山頂曰

冢旅衆也下士治衆事者自大宰至旅下

士轉相副貳皆王臣也王之卿六命其大

夫四命士以三命而下爲差府治藏史掌

周禮

天官

序官

三

稽古樓

書者凡府史皆其官長所自辟除胥徒民

給徭役者若今衛士矣胥讀如謂謂其有

才知爲什長

宮正上士二人中士四人下士八人府二人

史四人胥四人徒四十人

正長也宮正主宮中官之長

宮伯中士二人下士四人府一人史二人胥

二人徒二十人

伯長也

膳夫上士二人中士四人下士八人府二人

史四人胥十有二人徒百有二十人膳上戰反

膳之言善也今時美物曰珍膳膳夫食官之長也鄭司農以詩說之曰仲允膳夫

庖人中士四人下士八人府二人史四人賈

八人胥四人徒四十人庖扶交反賈音古

庖之言苞也裹肉曰苞苴賈主市買知物

周禮天官序官四稽古禮

賈

內饗中士四人下士八人府二人史四人胥

十人徒百人饗於容反

饗制亨煎和之稱內饗所主在內

外饗中士四人下士八人府二人史四人胥

十人徒百人

外饗所主在外

亨人下士四人府一人史二人胥五人徒五

十人亨音庚反

主為外內饗煮肉者

甸師下士二人府一人史二人胥三十人徒

三百人甸田遍反

郊外曰甸師猶長也甸師主共野物官之

長

獸人中士四人下士八人府二人史四人胥

四人徒四十人

周禮天官序官

五

稽古樓

廩人中士二人下士四人府二人史四人胥

三十人徒三百人廩音魚

鼈人下士四人府二人史二人徒十有六人

腊人下士四人府二人史二人徒二十人腊音昔

腊之言夕也

醫師上士二人下士四人府二人史二人徒

二十八

醫師眾醫之長

食醫中士二人

食有和齊藥之類

疾醫中士八人

瘍醫下士八人瘍音羊

瘍創癰也

獸醫下士四人

獸牛馬之類

周禮

天官

序官

六

稽古樓

酒正中士四人下士八人府二人史八人胥

八人徒八十八人

酒正酒官之長

酒人奄十人女酒三十人奚三百人

奄於檢反

奄精氣閉藏者今謂之宦人月令仲冬其

器闕以奄女酒女奴曉酒者古者從坐男

女没入縣官為奴其少才知以為奚今之

侍史官婢或曰奚宦女

漿人奄五人女漿十有五人奚百有五十人

漿于  
良反

女漿女奴曉漿者

凌人下士二人府二人史二人胥八人徒八

十人凌力  
證反

凌冰室也詩云二之日鑿冰沖沖三之日

納于凌陰

籩人奄一人女籩十人奚二十人

周禮天官

序官

七

稽古樓

竹曰籩女籩女奴之曉籩者

醢人奄一人女醢二十人奚四十人

醢呼  
在反

醢豆實也不謂之豆此主醢豆不盡于醢

也女醢女奴曉醢者

醢人奄二人女醢二十人奚四十人

醢呼  
西反

女醢女奴曉醢者

鹽人奄二人女鹽二十人奚四十人

女鹽女奴曉鹽者

幕人奄一人女幕十人奚二十人

幕莫  
豎反

以巾覆物曰幕女幕女奴曉幕者

宮人中士四人下士八人府二人史四人胥

八人徒八十人

掌舍下士四人府二人史四人徒四十人

舍行所解止之處

幕人下士一人府二人史二人徒四十人

武幕

博反

周禮

天官

序官

八

稽古樓

幕帷覆上者

掌次下士四人府四人史二人徒八十人

次自脩止之處

大府下大夫二人上士四人下士八人府四

人史八人賈十有六人胥八人徒八十人

大府為王治藏之長若今司農矣

玉府上士二人中士四人府二人史二人工

八人賈八人胥四人徒四十有八人

工能攻玉者

丙府中士二人府一人史二人徒十人

丙府主良貨賄藏在內者

外府中士二人府一人史二人徒十人

外府主泉藏在外者

司會中大夫二人下大夫四人上士八人中

士十有六人府四人史八人胥五人徒五十

人會古  
外反

周禮

天官

序官

九

稽古樓

會大計也司會主天下之大計計官之長

若今尚書

司書上士二人中士四人府二人史四人徒

八人

司書主計會之簿書

職內上士二人中士四人府四人史四人徒

二十人

職內主人也若今之泉所入謂之少內

職歲上士四人中士八人府四人史八人徒二十人

主歲計以歲斷

職幣上士二人中士四人府二人史四人賈四人胥二人徒二十人

司裘中士二人下士四人府二人史四人徒四十人

掌皮下士四人府二人史四人徒四十人

周禮

天官

序官

十

稽古樓

內宰下大夫二人上士四人中士八人府四人史八人胥八人徒八十人

內宰宮中官之長

內小臣奄上士四人史二人徒八人

奄稱士者異其賢

闈人王宮每門四人圍游亦如之

闈音昏圍音又游音

前

闈人司昏晨以啓閉者刑人墨者使守門

囿御苑也游離宮也

寺人王之正內五人

寺之言侍也詩云寺人孟子正內路寢

內豎倍寺人之數

豎未冠者之官名

九嬪

嬪符  
眞反

嬪婦也昏義曰古者天子后立六宮三夫

人九嬪二十七世婦八十一御妻以聽天

周禮

天官

序官

士

稽古樓

下之內治以明章婦順故天下內和而家  
理也不列夫人于此官者夫人之于后猶  
三公之于王坐而論婦禮無官職

世婦

不言數者君子不苟於色有婦德者充之  
無則闕

女御

昏義所謂御妻御猶進也侍也

女祝四人奚八人

祝之六反

女祝女奴曉祝事者

女史八人奚十有六人

女史女奴曉書者

典婦功中士二人下士四人府二人史四人

工四人賈四人徒二十人

典主也典婦功者主婦人絲枲功官之長

典絲下士二人府二人史二人賈四人徒十

周禮

天官

序官

士

稽古樓

有二人

典枲下士二人府二人史二人徒二十人

枲

反里

內司服奄一人女御二人奚八人

內司服主宮中裁縫官之長有女御者以

衣服進或當於王廣其禮使無色過

縫人奄二人女御八人女工八十人奚三十

人

縫扶用反

女工女奴曉裁縫者

染人下士二人府二人史二人徒二十人如

豔反

追師下士二人府一人史二人工二人徒四

人追丁回反

追治玉石之名

屨人下士二人府一人史一人工八人徒四

人屨紀具反

周禮天官序官主稽古樓

夏采下士四人史一人徒四人夏戶雅反

夏采夏翟羽色禹貢徐州貢夏翟之羽有

虞氏以為綬後世或無過染鳥羽象而用

之謂之夏采

大宰之職掌建邦之六典以佐王治邦國一

曰治典以經邦國以治官府以紀萬民二曰

教典以安邦國以教官府以擾萬民三曰禮

典以和邦國以統百官以諧萬民四曰政典

以平邦國以正百官以均萬民五曰刑典以詰邦國以刑百官以糾萬民六曰事典以富邦國以任百官以生萬民

擾饒上聲  
詰音乞

大曰邦小曰國邦之所居亦曰國典常也經也法也王謂之禮經常所秉以治天下也邦國官府謂之禮法常所守以爲法式也常者其上下通名擾猶馴也統猶合也詰猶禁也書曰度作詳刑以詰四方任猶俸也生猶養也鄭司農云治典冢宰之職故立其官曰使帥其屬而掌邦治以佐王均邦國敎典司徒之職故立其官曰使帥其屬而掌邦敎以佐王安擾邦國禮典宗伯之職故立其官曰使帥其屬而掌邦禮以佐王和邦國政典司馬之職故立其官曰使帥其屬而掌邦政以佐王平邦國刑典司寇之職故立其官曰使帥其屬而掌

周禮

天官

大宰

十四

稽古樓

邦禁以佐王刑邦國此三時皆有官唯冬  
無官又無司空以三隅反之則事典司空  
之職也司空之篇亡小宰職曰六曰冬官  
其屬六十掌邦事

以八灋治官府一曰官屬以舉邦治二曰官  
職以辨邦治三曰官聯以會官治四曰官常  
以聽官治五曰官成以經邦治六曰官灋以  
正邦治七曰官刑以糾邦治八曰官計以弊

邦治

周禮

天官

大宰

五

稽古樓

百官所居曰府弊斷也鄭司農云官屬謂  
六官其屬各六十若今博士大史太宰大  
祝大樂屬大常也小宰職曰以官府之六  
屬舉邦治一曰天官其屬六十是也官職  
謂六官之職小宰職曰以官府之六職辨  
邦治一曰治職二曰教職三曰禮職四曰  
政職五曰刑職六曰事職官聯謂國有大

事一官不能獨共則六官共舉之聯讀爲連古書連作聯聯謂連事通職相佐助也小宰職曰以官府之六聯合邦治一曰祭祀之聯事二曰賓客之聯事三曰喪荒之聯事四曰軍旅之聯事五曰田役之聯事六曰斂弛之聯事官常謂各自領其官之常職非連事通職所共也官成謂官府之成事品式也小宰職曰以官府之八成經

周禮

天官

大宰

六

稽古樓

邦治一曰聽政役以比居二曰聽師田以簡稽三曰聽閭里以版圖四曰聽稱責以傅別五曰聽祿位以禮命六曰聽取予以書契七曰聽賣買以質劑八曰聽出入以要會官灋謂職所主之法度官職主祭祀朝覲會同賓客者則皆自有其灋度小宰職曰以灋掌祭祀朝覲會同賓客之戒具官刑謂司刑所掌墨劓鼻宮鼻別劓殺

臯也官計謂三年則大計羣吏之治而誅  
賞之玄謂官刑司寇之職五刑其四曰官  
刑上能糾職官計謂小宰之六計所以斷  
羣吏之治

以八則治都鄙一曰祭祀以馭其神二曰灋  
則以馭其官三曰廢置以馭其吏四曰祿位  
以馭其士五曰賦貢以馭其用六曰禮俗以  
馭其民七曰刑賞以馭其威八曰田役以馭  
其衆

周禮

天官

大宰

七

稽古樓

都之所居曰鄙則亦灋也典灋則所用異  
異其名也都鄙公卿大夫之采邑王子弟  
所食邑周召毛聃畢原之屬在畿內者祭  
祀其先君社稷五祀灋則其官之制度廢  
猶退也退其不能者舉賢而置之祿若今  
月奉也位爵次也賦口率出泉也貢功也  
九職之功所稅也禮祀昏姻喪紀舊所行

也鄭司農云士謂學士

以八柄詔王馭羣臣一曰爵以馭其貴二曰  
祿以馭其富三曰予以馭其幸四曰置以馭  
其行五曰生以馭其福六曰奪以馭其貧七  
曰廢以馭其罪八曰誅以馭其過行去聲

柄所秉執以起事者也詔告也助也爵謂

公侯伯子男卿大夫士也詩曰誨爾序爵

言教王以賢否之第次也班祿所以富臣

周禮

天官

大宰

六

稽古樓

下書曰凡厥正人既富方穀幸謂言行偶

合於善則有以賜子之以勸後也生猶養

也賢臣之老者王有以養之成王封伯禽

於魯曰生以養周公死以爲周公後是也

五福一曰壽奪謂臣有大罪沒入家財者

六極四曰貧廢猶放也舜殛鯀于羽山是

也誅責讓也曲禮曰齒路馬有誅凡言馭

者所以馭之內之於善

以八統詔王馭萬民一曰親親二曰敬故三曰進賢四曰使能五曰保庸六曰尊貴七曰達吏八曰禮賓

統所以合率以等物也親親若堯親九族也敬故不慢舊也晏平仲久而敬之賢有善行也能多才藝者保庸安有功者尊貴尊天下之貴者孟子曰天下之達尊者三曰爵也德也齒也祭義曰先王之所以治天下者五貴有德貴貴老敬長慈幼達吏察舉勤勞之小吏也禮賓賓客諸侯所以示民親仁善鄰

周禮

天官

大字

十九

稽古樓

以九職任萬民一曰三農生九穀二曰園圃毓草木三曰虞衡作山澤之材四曰藪牧養蕃鳥獸五曰百工飭化八材六曰商賈阜通貨賄七曰嬪婦化治絲枲八曰臣妾聚斂疏材九曰閒民無常職轉移執事

毓古育字藪音叟賈音古

任猶傳也鄭司農云三農平地山澤也九穀黍稷秬稻麻大小豆大小麥八材珠曰切象曰磋玉曰琢石曰磨木曰刻金曰鏤革曰剝羽曰析開民謂無事業者轉移爲人執事若今傭賃也立謂三農原隰及平地九穀無秫大麥而有梁苽樹果蒺曰圃園其樊也虞衡掌山澤之官主山澤之民者澤無水曰藪牧牧田在遠郊皆畜牧之

周禮

天官

大宰

字

稽古樓

地行曰商處曰賈阜盛也金玉曰貨布帛曰賄嬪婦人之美稱也堯典曰釐降二女嬪于虞臣妾男女貧賤之稱晉惠公卜懷公之生曰將生一男一女男爲人臣女爲人妾生而名其男曰圉女曰妾及懷公質於秦妾爲宦女焉疏材百草根實可食者疏不熟曰饑

以九賦斂財賄一曰邦中之賦二曰四郊之

賦三曰郊甸之賦四曰家削之賦五曰邦縣之賦六曰邦都之賦七曰關市之賦八曰山

澤之賦九曰幣餘之賦

削稍去聲

財泉穀也鄭司農云邦中之賦二十而稅

一各有差也幣餘百工之餘立謂賦口率

出泉也今之算泉民或謂之賦此其舊名

與鄉大夫以歲時登其夫家之衆寡辨其

可任者國中自七尺以及六十野自六尺

周禮

天官

大宰

辛

稽古樓

以及六十有五皆征之遂師之職亦云以

徵其財征皆謂此賦也邦中在城郭者四

郊去國百里邦甸二百里家削三百里邦

縣四百里邦都五百里此平民也關市山

澤謂占會百物幣餘謂占賣國中之斥幣

皆末作當增賦者若今賈人倍算矣自邦

中以至幣餘各入其所有穀物以當賦泉

之數每處爲一書所待異也

以九式均節財用一曰祭祀之式二曰賓客之式三曰喪荒之式四曰羞服之式五曰工事之式六曰幣帛之式七曰芻秣之式八曰匪頒之式九曰好用之式

好去聲

式謂用財之節度荒凶年也羞飲食之物

也工作器物者幣帛所以贈勞賓客者芻秣養牛馬禾穀也鄭司農云匪分也頒讀

爲班布之班謂班賜也玄謂王所分賜羣

周禮

天官

大宰

三

稽古樓

臣也好用燕好所賜予

以九貢致邦國之用一曰祀貢二曰嬪貢三曰器貢四曰幣貢五曰材貢六曰貨貢七曰服貢八曰旂貢九曰物貢

旂音由

嬪故書作賓鄭司農云祀貢犧牲包茅之

屬賓貢皮帛之屬器貢宗廟之器幣貢繡

帛材貢木材也貨貢珠貝自然之物也服

貢祭服旂貢羽毛物貢九州之外各以其

所貴爲摯肅慎氏貢楛矢之屬是也玄謂  
嬪貢絲枲器貢銀鐵石磬丹漆也幣貢玉  
馬皮帛也材貢櫛榦栝柏篠簜也貨貢金  
玉龜貝也服貢絺紵也旂讀如囿游之游  
旂貢燕好珠璣琅玕也物貢雜物魚鹽橘  
柚

以九兩繫邦國之民一曰牧以地得民二曰  
長以貴得民三曰師以賢得民四曰儒以道  
周禮天官大宰垂稽古樓

得民五曰宗以族得民六曰主以利得民七  
曰吏以治得民八曰友以任得民九曰藪以  
富得民長上聲

兩猶耦也所以協耦萬民繫聯綴也牧州  
長也九州各有封域以居民也長諸侯也  
一邦之貴民所仰也師諸侯師氏有德行  
以教民者儒諸侯保氏有六藝以教民者  
宗繼別爲大宗收族者鄭司農云主謂公

卿大夫世世食采不絕民稅薄利之立謂  
利讀如上思利民之利謂以政教利之吏  
小吏在鄉邑者友謂同井相合耦耨作者  
孟子曰鄉田同井出入相友守望相助疾  
病相扶持則百姓親睦藪亦有虞掌其政  
令爲之厲禁使其地之民守其材物以時  
入于王府頒其餘於萬民富謂藪中材物

正月之吉始和布治于邦國都鄙乃縣治象

周禮

天官

大宰

音

稽古樓

之法于象魏使萬民觀治象挾日而斂之

縣音

懸挾音接

正月周之正月吉謂朔日大宰以正月朔  
日布王治之事於天下至正歲又書而縣  
于象魏振木鐸以徇之使萬民觀焉小宰  
亦帥其屬而往皆所以重治法新王事也  
凡治有故言始和者若改造云爾鄭司農  
云象魏闕也故魯災季桓子御公立于象

魏之外命藏象魏曰舊章不可忘從甲至甲謂之挾日凡十日

乃施典于邦國而建其牧立其監設其參傅

其伍陳其殷置其輔

騁音鑿參音騁傅音附

乃者更與勅之以侯伯有功德者加命作州長謂之牧所謂八命作牧者監謂公侯伯子男各監一國書曰王啟監厥亂爲民參謂卿三人伍謂大夫五人鄭司農云殷

周禮

天官

大宰

五

稽古樓

治律輔爲民之平也立謂殷衆也謂衆士也王制諸侯上士二十七人其中士下士各居其上之三分輔府史庶人在官者也乃施則于都鄙而建其長立其兩設其伍陳其殷置其輔

長上聲

長謂公卿大夫王子弟食采邑者兩謂兩卿不言三卿者不足于諸侯鄭司農云兩謂兩丞

乃施灋于官府而建其正立其貳設其攷陳其殷置其輔

正謂冢宰司徒宗伯司馬司寇司空也貳謂小宰小司徒小宗伯小司馬小司寇小司空也考成也佐成也者謂宰夫鄉師肆師軍司馬士師也司空亡未聞其考

凡治以典待邦國之治以則待都鄙之治以灋待官府之治以官成待萬民之治以禮待周禮天官大宰美稽古樓

賓客之治

成八成禮賓禮也

祀五帝則掌百官之警戒與其具脩前期十日帥執事而卜日遂疏帥同

祀五帝謂四郊三廟明堂誓戒要之以刑重失禮也明堂位疏各揚其職百官廢職

服大刑是其辭之略也其所當共作結陳糞酒前期前所設之日也十日容散齊七

日致齊三日執事宗伯大卜之屬既卜又  
戒百官以始齋

及執事既滌濯及納亨贊玉牲事及祀之日

贊玉幣爵之事

既同視  
亨同烹

執事初爲祭事前祭日之夕滌濯謂澆祭

器及饌甗之屬納亨納牲將告殺謂鄉祭

之晨既殺以授亨人凡大祭祀君親率牲

大夫贊之日且明也玉幣所以禮神玉與

周禮

天官

大宰

卷

禮

卷

禮

稽古樓

幣各如其方之色爵所以獻齊酒不用玉

爵尚質也三者執以從王至而授之

祀大神亦如之享先王亦如之贊玉几玉

爵

亦同  
視

大神祗謂天地玉几所以依神天子左右

玉几宗廟獻用玉爵

大朝覲會同贊玉幣玉獻玉几玉爵

朝音潮  
下同

助王受此四者時見日會殷見日同大會

同或於春朝或於秋覲舉春秋則冬夏可知玉幣諸侯享幣也其合亦如小行人所合六幣云玉獻獻國珍異亦執玉以致之王凡王所依也立而設几優尊者玉爵王禮諸侯之酢爵王朝諸侯立依前南而其禮之於阼階上

大喪贊贈玉含玉

含音械

助王爲之也贈玉旣窆所以送先王含玉

周禮

天官

大宰

天

稽古樓

死者口實天子以玉雜記曰含者執璧將

命曰寡君使某含則諸侯含以璧鄭司農

云含玉璧琮

作大事則戒于百官贊王命

助王爲教令春秋傳曰國之大事在祀與

戒

王旤治朝則贊聽治

治朝在路門外羣臣治事之朝王視之則

助王平斷

砥四方之聽朝亦如之

謂王巡守在外時

凡邦之小治則冢宰聽之待四方之賓客之

小治

大事決於王小事冢宰傳平

歲終則令百官府各正其治受其會聽其致

事而詔王廢置

會音怪凡各職要會會計之會字並放此

周禮

天官

大宰

三

稽古樓

歲終周季冬日也正正處也會大計也聽

其致事者平其事來至者之功狀而奏白

王

三歲則大計羣吏之治而誅賞之

事久則聽之大無功不徒廢必罪之大有

功不徒置必賞之鄭司農云三載考績

小宰之職掌建邦之宮刑以治王宮之政令

凡宮之糾禁

杜子春云宮當皆爲官立謂宮刑在王宮  
中者之刑建明布告之糾猶割也察也若  
今御史中丞

掌邦之六典八灋八則之貳以逆邦國都鄙  
官府之治執邦之九貢九賦九式之貳以均  
財節邦用

逆迎受之鄭司農云貳副也

以官府之六敘正羣吏一曰以敘正其位二

周禮

天官

小宰

三

稽古樓

曰以敘進其治三曰以敘作其事四曰以敘  
制其食五曰以敘受其會六曰以敘聽其情

敘秩次也謂先尊後卑也治功狀也食祿  
之多少情爭訟之辭

以官府之六屬舉邦治一曰天官其屬六十  
掌邦治大事則從其長小事則專達二曰地  
官其屬六十掌邦教大事則從其長小事則  
專達三曰春官其屬六十掌邦禮大事則從

其長小事則專達四曰夏官其屬六十掌邦  
政大事則從其長小事則專達五曰秋官其  
屬六十掌邦刑大事則從其長小事則專達  
六曰冬官其屬六十掌邦事大事則從其長  
小事則專達

長上聲

大事從其長若庖人內外饗與膳夫共王  
之食小事專達若宮人掌舍各爲一官六

官之屬三百六十象天地四時日月星辰

周禮

天官

小宰

三

稽古樓

之度數天道備焉前此者成王作周官其  
志有述天授位之義故周公設官分職以  
灋之

以官府之六職辨邦治一曰治職以平邦國  
以均萬民以節財用二曰教職以安邦國以  
寧萬民以懷賓客三曰禮職以和邦國以諧  
萬民以事鬼神四曰政職以服邦國以正萬  
民以聚百物五曰刑職以詰邦國以糾萬民

以除盜賊六曰事職以富邦國以養萬民以生百物

懷亦安也賓客來共其委積所以安之聚百物者司馬主九畿職方制其貢各以其所有

以官府之六聯合邦治一曰祭祀之聯事二曰賓客之聯事三曰喪荒之聯事四曰軍旅之聯事五曰田役之聯事六曰斂弛之聯事

周禮

天官

小宰

三

稽古樓

凡小事皆有聯

鄭司農云大祭祀大宰贊玉幣司徒奉牛

牲宗伯視滌濯滂玉鬯省牲饌奉玉盥司

馬羞魚牲奉馬牲司寇奉明火火大喪大

宰贊贈玉含玉司徒帥六鄉之衆庶屬其

六綉宗伯爲上相司馬平士大夫司寇前

王此所謂官聯杜子春弛讀爲施玄謂荒

政弛力役及國中貴者賢者服公事者老

者疾者皆舍不以力役之事奉牲者其司  
空奉豕與

以官府之八成經邦治一曰聽政役以比居  
二曰聽師田以簡稽三曰聽閭里以版圖四  
曰聽稱責以傅別五曰聽祿位以禮命六曰  
聽取予以書契七曰聽賣買以質劑八曰聽  
出入以要會

比音避責同債傅音  
附予音羽劑音莖

鄭司農云政謂軍政也役謂發兵起徒役

周禮

天官

小宰

三

稽古樓

也比居謂伍籍也比地爲伍因內政寄軍  
令以伍籍發軍起役者平而無遺脫也簡  
稽士卒兵器簿書簡猶閱也稽猶計也合  
也合計其士之卒伍閱其兵器爲之要簿  
也故遂人職曰稽其人民簡其兵器國語  
曰黃池之會吳陳其兵皆官師擁鐸拱稽  
版戶籍圖地圖也聽人訟地者以版圖決  
之司書職曰邦中之版土地之圖稱責謂

貸予傅別謂券書也聽訟責者以券書決  
之傅傅著約束於文書別別爲兩兩家各  
得一也禮命謂九賜也書契符書也質劑  
謂市中平賈今時月平是也要會謂計最  
之簿書月計曰要歲計曰會故宰夫職曰  
歲終則令羣吏正歲會月終則令正月要  
傅別故書作傅辨鄭大夫讀爲符別杜子  
春讀爲傅別玄謂政謂賦也凡其字或作  
政或作正或作征以多言之宜從征如孟  
子交征利云傅別謂爲大手書於一札中  
字別之書契謂出予受入之凡要凡簿書  
之最目獄訟之要辭皆曰契春秋傳曰王  
叔氏不能舉其契質劑謂兩書一札同而  
別之長曰質短曰劑傅別質劑皆今之券  
書也事異異其名耳禮命禮之九命之差

周禮

天官

小宰

語

稽古樓

以聽官府之六計弊羣吏之治一曰廉善二曰廉能三曰廉敬四曰廉正五曰廉潔六曰廉辨

聽平治也平治官府之計有六事弊斷也既斷以六事又以廉爲本善善其事有辭譽也能政令行也敬不解於位也正行無傾邪也灑守灑不失也辨辨然不疑惑也杜子春云廉辨或爲廉端

周禮

天官

小宰

三

稽古樓

以灑掌祭祀朝覲會同賓客之戒具軍旅田役喪荒亦如之七事者令百府官共其財用

治其施舍聽其治訟

胡音潮共音茶各職放此

灑謂其禮灑也戒具戒官有事者所當共七事謂先四如之者三也施舍不給役者七事故書爲小事杜子春云當爲七事書亦爲七事

凡祭祀贊王幣爵之事裸將之事

又從大宰助王也將送也裸送送裸謂贊  
王酌鬱鬯以獻尸謂之裸裸之言灌也明  
不爲飲主以祭祀唯人道宗廟有裸天地  
大神至尊不裸莫稱焉凡鬱鬯受祭之啐  
之奠之

### 凡賓客贊裸凡受爵之事凡受幣之事

唯裸助宗伯其餘皆助大宰王不酌賓客  
而有受酢大宗伯職曰大賓客則攝而載

周禮

天官

小宰

五

稽古樓

裸

### 喪荒受其含禭幣玉之事

春秋傳曰口實曰含衣服曰禭凶荒有幣  
玉者賓客所賙委之禮

### 月終則以官府之敘受羣吏之要

主每月之小計

### 贊冢宰受歲會歲終則令羣吏致事

使齋歲盡文書來至若今上計

正歲帥治官之屬而觀治象之法徇以木鐸  
曰不用灋者國有常刑乃退以宮刑憲禁于  
王宮令于百官府曰各脩乃職攷乃灋待乃  
事以聽王命其有不共則國有大刑

正歲謂夏之正月得四時之正以出教令  
者審也古者將有新令必奮木鐸以警眾  
使明聽也木鐸木舌也文事奮木鐸武事  
奮金鐸憲謂表縣之若今新有灋令云乃  
周禮天官小宰

猶女也

稽古樓

宰夫之職掌治朝之灋以正王及三公六卿

大夫羣吏之位掌其禁令

朝音潮  
後皆同

治朝在路門之外其位司士掌焉宰夫察

其不如儀

敘羣吏之治以待賓客之令諸臣之復萬民  
之逆

恒次敘諸吏之職事三者之來則應使辨

理之鄭司農云復請也逆迎受王命者宰  
夫主諸臣萬民之復逆故詩人重之曰家  
伯維宰玄謂復之言報也反也反報於王

謂於朝廷奏事自下而上曰逆逆謂上書

掌百官府之徵令辨其八職一曰正掌官灋  
以治要二曰師掌官成以治凡三曰司掌官  
灋以治目四曰旅掌官常以治數五曰府掌  
官契以治藏六曰史掌官書以贊治七曰胥

周禮

天官

宰夫

庚

稽古樓

掌官敘以治敘八曰徒掌官令以徵令

藏才  
浪反

別異諸官之八職以備王之徵召所爲正

辟於治官則冢宰也治要若歲計也師辟

小宰宰夫也治凡若月計也司辟上士中

士治目若今日計也旅辟下士也治數每

事多少異也治藏藏文書及器物贊治若

今起文書草也治敘次序官中如今侍曹

伍伯傳吏朝也徵令趨走給招呼

掌治灋以攷百官府羣都縣鄙之治乘其財用之出入凡失財用物辟名者以官刑詔冢宰而誅之其足用長財善物者賞之

辟同避長上聲

羣都諸采邑也六遂五百家為鄙五鄙為

縣言縣鄙而六鄉州黨亦存焉乘猶計也

財泉穀也用貨賄也物畜獸也辟名詐為

書以空作見文書與實不相應也官刑在

司寇五刑第四者

周禮

天官

宰夫

三

稽古樓

以式灋掌祭祀之戒具與其薦羞從大宰而

眡滌濯凡禮事贊小宰比官府之具凡朝覲

會同賓客以牢禮之灋掌其牢禮委積膳獻

飲食賓賜之餼宰與其陳數

委音穢積音恣後放此餼音孫

薦脯醢也羞庶羞內羞比較次之牢禮之

灋多少之差及其時也三牲牛羊豕具為

一牢委積謂牢米薪芻給賓客道用也膳

獻禽羞俶獻也飲食燕饗也鄭司農云餼

夕食也春秋傳曰殯有啗鼎宰牲牢可宰而行者春秋傳曰餼宰竭矣立謂殯宰始至所致禮凡此禮陳數存可見者唯有人宰客及聘禮公食大夫

凡邦之弔事掌其戒令與其幣器財用凡所共者大喪小喪掌小官之戒令帥執事而治之三公六卿之喪與職喪帥官有司而治之凡諸大夫之喪使其旅帥有司而治之

周禮

天官

宰夫

弔

稽古樓

弔事弔諸侯諸臣幣所用賻也器所致明器也凡喪始死弔而含襚葬而贈贈其間加恩厚則有賻焉春秋譏武氏子來求賻大喪王后世子也小喪夫人以下小官士也其大官則冢宰掌其戒令治誦共辨旅

冢宰下七

歲終則令羣吏正歲會月終則令正月要旬終則令正日成而以攷其治治不以時舉者

以告而誅之

歲終周季冬也正猶定也旬十日也治不時舉者謂違時令失期會

正歲則以灋警戒羣吏令脩宮中之職事

警勅戒之言鄭司農云正歲之正月以灋戒勅羣吏

書其能者與其良者而以告于上

良猶善也上謂小宰大宰也鄭司農云若

周禮天官宰夫

四上稽古樓

今時舉孝廉賢良方正茂才異等

宮正掌王宮之戒令糾禁以時比宮中之官

府次舍之眾寡比毗志反舍音赦

糾猶割也察也時四時比按次其人之在

否官府之在宮中者若膳夫玉府內宰內

史之屬次諸吏直宿若今部署諸廬者舍

其所居寺

爲之版以待

鄭司農云爲官府次舍之版圖也待待比也玄謂版其人之名籍待待戒令及比

夕擊柝而比之國有故則令宿其比亦如之

柝吐各反

夕莫也莫行夜以比直宿者爲其有解惰

離部署鄭司農云柝戒守者所擊也易曰重門擊柝以待暴客春秋傳曰魯擊柝聞

於邾故謂禍哉令宿宿衛王宮春秋傳曰

周禮

天官

宮正

聖二

稽古樓

忘守必危况有災乎玄謂故凡非常也文王世子曰公有出疆之政庶子以公族之無事者守於公宮正室守大廟諸父守貴宮貴室諸子諸孫守下宮下室此謂諸侯也王之庶子職掌國子之倅國有大事則帥國子而致於太子唯所用之者令宿之事蓋亦存焉

辨外內而時禁

鄭司農云分別外人內人禁其非時出入

稽其功緒糾其德行幾其出入均其稍食去

其淫怠與其奇衰之民

行去聲幾同譏去上聲奇音雞衰音斜

稽猶考也計也功吏職也緒其志業鄭司

農云幾其出入若今時宮中有罪禁止不

能出亦不得入及無引籍不得入宮司馬

殿門也立謂幾呵其衣服持操及疏數者

稍食祿稟民宮中吏之家人也淫放濫也

周禮

天官

宮正

聖

稽古樓

怠懈慢也奇衰譎觚非常

會其什伍而教之道藝

五人為伍二伍為什會之者使之輩作輩

學相勸帥其寄宿衛之令鄭司農云道謂

先王所以教道民者藝謂禮樂射御書數

月終則會其稍食歲終則會其行事

行事吏職也

凡邦之大事令于王宮之官府次舍無去守

而聽政令

使居其處待所爲

春秋以木鐸脩火禁

火星以春出以秋入因天時而以戒

凡邦之事蹕宮中廟中則執燭

蹕音畢

鄭司農讀火絕之云禁凡邦之事蹕國有

事王當出則宮正主禁絕行者若今時衛

士填街蹕也宮中廟中則執燭宮正主爲

周禮

天官

宮正

禮

稽古樓

王於宮中廟中執燭玄謂事祭事也邦之

祭社稷七祀於宮中祭先先王於廟中

隸僕掌蹕止行者宮正則執燭以爲明春

秋傳曰有大事於太廟又曰有事於武宮

大喪則授廬舍辨其親疏貴賤之居

廬倚廬也舍室室也親者貴者居倚廬疏

者賤者居室室雜記曰大夫居廬士居室

室

宮伯掌王宮之士庶子凡在版者

鄭司農云庶子宿衛之官版名籍也以版爲之今時鄉戶籍謂之戶版立謂王宮之士謂王宮中諸吏之適子也庶子其支庶也

掌其政令行其秩敘作其徒役之事

秩祿稟也敘才等也作徒役之事天子所用

周禮

天官

宮伯

墨

稽古樓

授八次八舍之職事

衛王宮者必居四角四中於微候便也鄭司農云庶子衛王宮在內爲次在外爲舍立謂次其宿衛所在舍其休沐之處

若邦有大事作宮衆則令之

謂王宮之士庶子於邦有大事或邊當行

月終則均秩歲終則均敘以時頒其衣裳掌

其誅賞

頌讀爲班班布也衣裘若今賦冬夏衣一

膳夫掌王之食飲膳羞以養王及后世子音食

嗣

食飯也飲酒漿也膳牲肉也羞有滋味者

凡養之具大略有四

凡王之饋食用六穀膳用六牲飲用六清羞

用百有二十品珍用八物醬用百有二十音

金 舊音

周禮

天官

膳夫

吳

稽古樓

進物於尊者曰饋此饋之盛者王舉之饌

也六牲馬牛羊豕犬雞也羞出於牲及禽

獸以備滋味謂之庶羞公食大夫禮內則

下大夫十六上大夫二十其物數備焉天

子諸侯有其數而物未得盡聞珍謂淳熬

淳母炮豚炮牂擣珍漬熬肝膋也醬謂醢

醢也王舉則醢人共醢六十醬以五齏七

醢七菹三醬貫之醢人共齏菹醢物六十

饗鄭司農云羞進也六穀稌黍稷粱麥苽  
苽彫胡也六清水漿醴醑鬯鬻醢

王曰一舉鼎十有二物皆有俎

殺牲盛饌曰舉王曰一舉以朝食也后與  
王同庖鼎十有二牢鼎九陪鼎三物謂牢  
鼎之實亦九俎

以樂侑食膳夫授祭品嘗食王乃食卒食以

樂徹于造

周禮

天官

膳夫

卷七

稽古樓

侑猶勸也祭謂刊肺脊也禮飲食必祭示  
有所先品者每物皆嘗之道尊者也造作  
也鄭司農云造謂食之故所居處也已食  
徹置故處

王齊曰三舉

齊音齋曰三舉王氏應電云  
宜作則不舉與下文類相從

鄭司農云齊必變食

大喪則不舉大荒則不舉大札則不舉天地

有裁則不舉邦有大故則不舉

札蓋  
入聲

大荒凶年大札疫癘也天裁日月啗食地  
裁崩動也大故寇戎之事鄭司農云大故  
刑殺也春秋傳曰司寇行戮君爲之不舉

### 王燕食則奉膳贊祭

燕食謂日中與夕食奉膳奉朝之餘膳所  
祭者牢肉

### 凡王祭祀賓客食則徹王之胾俎

膳夫親徹胾俎胾俎最尊也其餘則其屬

### 周禮

天官

膳夫

哭

稽古樓

徹之賓客食而王有胾俎王與賓客禮食  
主人飲食之俎皆爲胾俎見於此矣

### 凡王之稍事設薦脯醢

鄭司農云稍事爲非日中大舉時而間食  
謂之稍事膳夫主設薦脯醢玄謂稍事有  
小事而飲酒

### 王燕飲酒則爲獻主

鄭司農云主人當獻賓則膳夫代王爲主

君不祲臣也燕義曰使宰夫爲獻王臣莫敢與君亢禮

掌后及世子之膳羞

亦主其饌之數不饋之耳

凡肉脩之頒賜皆掌之

鄭司農云脩脯也

凡祭祀之致福者受而膳之

致福謂諸臣祭祀進其餘肉歸胙于王鄭

周禮

天官

膳夫

四九

稽古樓

司農云膳夫受之以給王膳

以摯見者亦如之

鄭司農云以羔鴈雉爲摯見者亦受以給

王膳

歲終則會唯王及后世子之膳不會

不會計多少優尊者其頒賜諸臣則計之

庖人掌其六畜六獸六禽辨其名物

六畜六牲也始養之曰畜將用之曰牲春

秋傳曰卜曰牲鄭司農云六獸麋鹿熊  
麇野豕兔六禽鴈鶉雉鳩鴿玄謂獸人  
冬獻狼夏獻麋又內則無熊則六獸當有  
狼而熊不屬六禽於禽獻及六犖宜爲羔  
豚犢騂雉鴈凡鳥獸未孕曰禽司馬職曰  
大獸公之小禽私之

凡其死生蠶薨之物以共王之膳與其薦羞  
之物及后世子之膳羞

蠶同鮮  
薨音考

周禮

天官

庖人

手

稽古樓

凡計數之薦亦進也備品物曰薦致滋味  
乃爲羞王言薦者味以不褻爲尊鄭司農  
云鮮謂生肉薨謂乾肉

共祭祀之好羞

好去聲

謂四時所爲膳食若荊州之鱉魚青州之  
蟹胥雖非常物進之孝也

共喪紀之庶羞賓客之禽獻

喪紀喪事之祭謂虞祔也禽獻獻禽於賓

客獻古文爲獸杜子春云當爲獻

凡令禽獻以瀡投之其出入亦如之

令令獸人也禽獸不可久處賓客至將獻

之庖人乃令獸人取之必書所當獻之數

與之及其來致禽亦以此書校數之至于

獻賓客又以此書付使者展而行之掌客

乘禽於諸侯各如其命之數聘禮乘禽於

客日如其饗餼之數士中日則二雙

周禮

天官

庖人

五

稽古樓

凡用禽獻春行羔豚膳膏香夏行腍鱠膳膏

臊秋行犢麋膳膏腥冬行鱻羽膳膏羶

音搜腍  
音騷

腍音  
渠鱠

用禽獻謂煎和之以獻王鄭司農云膏香

牛脂也以牛脂和之膳乾雉鱠乾魚膏腍

豕膏也以豕膏和之杜子春云膏臊犬膏

膏腥豕膏也鮮魚也羽鴈也膏羶羊脂也

玄謂膏腥雞膏也羔豚物生而肥犢與麋

物成而充腍鱗曠熱而乾魚鴈水涸而性定此八物者得四時之氣尤盛爲人食之弗勝是以用休廢之脂膏煎和膳之牛屬司徒土也雞屬宗伯木也犬屬司寇金也羊屬司馬火也

歲終則會唯王及后之膳禽不會

膳禽四時所膳禽獻如世子可以會之

內饗掌王及后世子膳羞之割亨煎和之事

周禮

天官

內饗

至

稽古樓

辨體名肉物辨百品味之物

和去聲

割肆解肉也亨煮也煎和齊以五味體名

脊脅肩臂臠之屬肉物載燔之屬百品味

庶羞之屬言百舉成數

王舉則陳其鼎俎以牲體實之

取於鑊以實鼎取於鼎以實俎實鼎曰脊

實俎曰載

選百羞醬物珍物以俟饋

先進食之時恒選擇其中御者

共后及世子之膳羞

膳夫掌之是乃共之

辨腥臊羶香之不可食者牛夜鳴則膺羊冷毛而羸羶犬赤股而躁臊鳥鵠色而沙鳴狸豕盲眊而交睫腥馬黑脊而般臂蠖

狸音鬱

腥臊羶香可食者是別其不可食者則所

謂者皆臭味也冷毛毛長總結也鵠失色

周禮

天官

內饗

五

稽古樓

不澤美也沙澌也交睫腥腥當為星聲之

誤也肉有如米者似星般臂臂毛有文鄭

司農云膺朽木臭也蠖蠖蝻臭也杜子春

云盲眊當為望視

凡宗廟之祭祀掌割亨之事凡燕飲食亦如

之凡掌共羞脩劑臠胙骨鱠以待共膳凡王

之好賜肉脩則饗人共之

臠音呼好去聲

掌共共當為具羞庶羞也脩鍛脯也胙如

脯而腥者鄭司農云刑膾謂夾脊肉或曰膾肉也骨鱠謂骨有肉者玄謂刑劔羹也膾腍肉大臠所以祭者骨牲體也鱠乾魚好賜王所善而賜也

外饗掌外祭祀之割亨共其脯脩刑膾陳其鼎俎實之牲體魚腊凡賓客之殽饗饗食之事亦如之

腊音昔  
食音嗣

殽客始至之禮饗既將幣之禮致禮於客

周禮

天官

外饗

五十四

稽古樓

莫盛於饗

邦饗耆老孤子則掌其割亨之事饗士庶子亦如之師役則掌其獻賜脯肉之事

孤子者死王事者之子也士庶子衛王宮

者若今時之饗衛士矣王制曰周人養國老於東膠養庶老於虞庠獻謂酌其長帥

凡小喪紀陳其鼎俎而實之

謂喪事之奠祭

亨人掌共鼎鑊以給水火之齊職外內饗之

饗亨煑辨膳羞之物祭祀共大羹鉶羹賓客

亦如之齊同劑大音泰

鑊所以煑肉及魚腊之器既孰乃胥于鼎

齊多少之量職主也饗今之竈主於其竈

煑物大羹肉湑鄭司農云大羹不致五味

也鉶羹加鹽菜矣

甸師掌帥其屬而耕耨王藉以時入之以共

周禮天官甸師甸師五五稽古樓

齋盛齋音資

其屬府史胥徒也耨芸苧也王以孟春躬

耕帝藉天子三推三公五推卿諸侯九推

庶人終於千畝庶人謂徒三百人藉之言

借也王一耕之而使庶人芸苧終之齋盛

祭祀所用穀也粢稷也穀者稷為長是以

名云在器曰盛

祭祀共蕭茅

鄭大夫云蕭字或爲蒿讀爲縮束茅立  
之祭前沃酒其上酒滲下去若神飲之故  
謂之縮縮浚也故齊桓公責楚不貢苞茅  
王祭不共無以縮酒杜子春讀爲蕭蕭香  
蒿也玄謂詩所云取蕭祭脂郊特牲云蕭  
合黍稷臭陽達於牆屋故既薦然後炳蕭  
合馨香合馨香者是蕭之謂也茅以共祭  
之苴亦以縮酒苴以藉祭縮酒泝酒也禮

周禮

天官

甸師

巽

稽古樓

齊縮酌

共野果蒺之薦

蒺音裸

甸在遠郊之外郊外曰野果桃李之屬蒺

瓜瓞之屬

喪事代王受胄栽

胄生上聲

棗盛者祭祀之主也今國遭大喪若云此  
黍稷不馨使鬼神不逞于王既殯大祝作  
禱辭授甸人使以禱藉田之神受胄栽弭

後殃

王之同姓有旱則死刑焉

鄭司農云王同姓有罪當刑者斷其獄於甸師之官也文王世子曰公族有死罪則磬於甸人又曰公族無宮刑獄成致刑于甸人又曰公族無宮刑不踐其類也刑于隱者不與國人慮兄弟

帥其徒以薪蒸役外內饗之事

周禮

天官

甸師

五七

稽古樓

役爲給役也木大曰薪小曰蒸

獸人掌罟田獸辨其名物冬獻狼夏獻麋春秋獻獸物

罟罔也以罔搏所當田之獸狼膏聚麋膏散聚則溫散則涼以救時之苦也獸物凡獸皆可獻也及狐狸

時田則守罟及弊田令禽注于虞中

守罟備獸觸攫弊仆也仆而田止鄭司農

云弊田謂春火弊夏車弊秋羅弊冬徒弊  
虞中謂虞人釐所田之野及弊田植虞旗  
於其中致禽而珥焉獸人主令田衆得禽  
者置虞人所立虞旗之中當以給四時社  
廟之祭故曰春獻禽以祭社夏獻禽以享  
禴秋獻禽以祀祊冬獻禽以享烝又曰大  
獸公之小禽私之公之謂輸之於虞中珥  
焉者取左耳以致功若斬首折馘故春秋  
周禮天官獸人癸稽古樓

傳曰以數軍實

凡祭祀喪紀賓客共其死獸生獸

共其完者

凡獸入于腊人皮毛筋角入于玉府

入于腊人當乾之也入于玉府給作器物  
也

凡田獸者掌其政令

廩人掌以時廩爲梁

月令季冬命漁師爲梁鄭司農云梁水偃也偃水爲闕空以笱承其空詩曰敝笱在梁

春獻王鮪辨魚物爲鱻以共王膳羞凡祭祀賓客喪紀共其魚之鱻

王鮪鮪之大者月令季春薦鮪于寢廟鮮生也鱻乾也

凡獻者掌其政令凡獻征入于玉府

周禮

天官

獻人

鱻人

龜人

弄

堯

稽古樓

鄭司農云漁征漁者之租稅漁人主收之入于玉府

鼈人掌取互物

鄭司農云互物謂有甲滿胡龜鼈之屬

以時簞魚鼈蜃凡狸物

簞音綽狸音埋蜃辰上聲

蜃大蛤鄭司農云簞謂以杈刺泥中搏取之狸物龜鼈之屬自狸藏伏於泥中者玄

謂狸物亦謂鱮刀含漿之屬

春獻鼈蜃秋獻龜魚

此其出在淺處可得之時魚亦謂自狸藏

祭祀共蠃蚺蚺以授醢人掌凡邦之簪事廡

上聲羸音  
羅蚺音池

羸蚺蚺鄭司農云蠃蛤也杜子春云蠃蚺

也蚺蚺子國語曰蠃舍蚺蚺

腊人掌乾肉凡田獸之脯腊臠胖之事凡祭

祀共豆脯薦脯臠胖凡腊物賓客喪紀共其

周禮天官

腊人

卒

稽古樓

脯腊凡乾肉之事

大物解肆乾之謂之乾肉若今涼州烏翅

矣薄析曰脯極之而施薑桂曰鍛脩腊小

物全乾脯非豆實豆當為羞聲之誤也鄭

司農云臠胖肉鄭大夫云胖讀為判杜子

春讀胖為版又云臠胖皆謂夾脊肉又云

禮家以胖為半體玄謂公食大夫禮曰庶

羞皆有大者此據肉之所擬祭者也又引

有司徹曰主人亦一魚加鰾祭于其上此據主人擬祭者鰾與大亦一也內則曰麋鹿田豕麋皆有胖足相參正也大者蔽之大鰾鰾者魚之反覆鰾又詁曰大二者同矣則是鰾亦腍肉大鰾胖宜爲脯而腥胖之言片也析肉意也禮固有腥臠燭雖其有爲孰之皆先制乃亨

### 天官冢宰下

周禮

天官

冢宰

醫師

空

稽古樓

醫師掌醫之政令聚毒藥以共醫事凡邦之有疾病者疝瘍者造焉則使醫分而治之疝音彼

毒藥藥之辛苦者藥之物恒多毒孟子曰若藥不瞑眩厥疾不瘳疝頭瘍亦謂禿也身傷曰瘍分之者醫各有能

歲終則稽其醫事以制其食十全爲上十失一次之十失二次之十失三次之十失四爲

下

食祿也全猶愈也以失四為下者五則半矣或不治自愈

食醫掌和王之六食六飲六膳百羞百醬八

珍之齊

和去聲食音嗣齊通劑下並同

和調也

凡食齊眠春時羹齊眠夏時醬齊眠秋時飲

齊眠冬時

周禮

天官

食醫

卷

稽古樓

飯宜溫美宜熱醬宜涼飲宜寒

凡和春多酸夏多苦秋多辛冬多鹹調以滑

甘

各尚其時味而甘以成之猶水火金木之

載於土內則曰棗栗餈蜜以甘之堇荳粉

榆煖稿滫髓以滑之

凡會膳食之宜牛宜稌羊宜黍豕宜稷犬宜

梁鳩宜麥魚宜菘

稌音杜菘音菘

會成也謂其味相成鄭司農云稌稷也爾

雅曰稌稻菰彫胡也

凡君子之食恒放焉

放上聲

放猶依也

疾醫掌養萬民之疾病四時皆有癘疾春時  
有疝首疾夏時有痒疥疾秋時有瘧寒疾冬  
時有嗽上氣疾

癘音消  
上上聲

癘疾氣不和之疾瘡酸削也首疾頭痛也

周禮

天官

疾醫

卷

卷

卷

卷

稽古樓

嗽欬也上氣逆喘也五行傳曰大癘作見

以五味五穀五藥養其病

養猶治也病由氣勝負而生攻其羸養其  
不足者五味醯酒飴蜜薑鹽之屬五穀麻  
黍稷麥豆也五藥草木蟲石穀也其治合  
之齊則存乎神農子儀之術云

以五氣五聲五色眠其死生

三者劇易之微見於外者五氣五藏所出

氣也肺氣熱心氣次之肝氣涼脾氣溫腎  
氣寒五聲音語宮商角徵羽也五色面貌  
青赤黃白黑也察其盈虛休王吉凶可知  
審用此者莫若扁鵲倉公

兩之以九竅之變參之以九藏之動

藏去聲

兩參之者以觀其死生之驗竅之變謂開  
閉非常陽竅七陰竅二藏之動謂脉至與  
不至正藏五又有胃膀胱大腸小腸脉之  
周禮 天官疾醫 六畜 稽古樓

周禮

天官

疾醫

六畜

稽古樓

大候要在陽明寸口能專是者其唯秦和  
乎岐伯榆柎則兼彼數術者  
凡民之有疾病者分而治之死終則各書其  
所以而入于醫師

少者曰死者曰終所以謂治之不愈之  
狀也醫師得以制其祿且爲後治之戒

瘍醫掌腫瘍潰瘍金瘍折瘍之祝藥劑殺之

齊

瘍音羊副音  
副齊同劑

腫瘍癰而上生創者潰瘍癰而含膿血者  
金瘍刃創也折瘍踣跌者祝富爲注讀如  
注病之注聲之誤也注謂附著藥劑刮去  
膿血殺謂以藥食其惡肉

凡療瘍以五毒攻之以五氣養之以五藥療  
之以五味節之

止病曰療攻治也五毒五藥之有毒者今  
醫方有五毒之藥作之合黃堊置石膽丹

周禮

天官

瘍醫

卷

稽古樓

砂雄黃礬石慈石其中燒之三日三夜其  
煙上著以雞羽掃取之以注創惡肉破骨  
則盡出旣刮殺而攻盡其宿肉乃養之也  
五氣當爲五穀字之誤也節節成其藥之

力

凡藥以酸養骨以辛養筋以鹹養脈以苦養  
氣以甘養肉以滑養竅凡有瘍者受其藥焉  
以類相養也酸木味木根立地中似骨辛

金味金之纏合異物似筋鹹水味水之流  
行地中似脈苦火味火出入無形似氣甘  
土味土含載四者似肉滑滑石也凡諸滑  
物通利往來似竅

獸醫掌療獸病療獸瘍

畜獸之疾病及瘍療同醫

凡療獸病灌而行之以節之以動其氣觀其  
所發而養之

周禮

天官

獸醫

畜

稽古樓

療畜獸必灌行之者爲其病狀難知灌以  
緩之且強其氣也節趨聚之節也氣謂脈  
氣既行之乃以脈視之以知所病

凡療獸瘍灌而劑之以發其惡然後藥之養

之食之

食音  
嗣

亦先攻之而後養之

凡獸之有病者有瘍者使療之死則計其數  
以進退之

